

CHÌLLIO (*Testu J. Rusta – Mùsica G. Altea*)

Canno nche cupat su sole
E sa luce si l'aviat
Si su coro no mi dolet
Ti torro cussas ninnias

Chìllio cussos ammentos
Chi in sa mente son pintatos
E in su tempus istento
In corrales aoratos
De su locu chi m'imbento
Pro t'idere àteras bias

Si su coro no mi dolet
Ti torro cussas ninnias

Chìllio cussos pessamentos
Chi semper apo miratu
Galu como mi los sento
E nde resto ababiocatu
E in s'ànima m'assento
Sos sonos de pitzinnia

Si su coro no mi dolet
Ti torro cussas ninnias

Chìllio sas manos istracas
Chi m'ant giutu in su caminu
De su tretu chi non pacat
Ca cumannat su destinu
Ma s'olvidu no s'intacat
E rucrat donzi agonia

Si su coro no mi dolet
Ti torro cussas ninnias